

Uvodna izjava predsjedavajućeg Odbora guvernera EBRD-a

**28. godišnji sastanak EBRD-a, Sarajevo
7 - 9. maj 2019.**

**Odbor guvernera EBRD-a - uvodna sjednica
8. maj 2019.**

**Jyrki Katainen, potpredsjednik,
komesar za radna mjesta, rast, ulaganja i konkurentnost,
guverner EBRD-a ispred EU,
predsjedavajući Odbora guvernera EBRD-a**

Poštovani predsjedavajući Vijeća ministara Bosne i Hercegovine,
vaše ekselencije,
cijenjeni guverneri, uvaženi predsjedniče,
dame i gospodo,

Nakon ovog inspirativnog video-zapisa, imam čast da vam poželim dobrodošlicu na 28. godišnji sastanak Evropske banke za obnovu i razvoj.

Dozvolite mi da pozdravim predsjedavajućeg Vijeća ministara Bosne i Hercegovine, njegovu ekselenciju Denisa Zvizdića. Velika mi je čast da predsjedavam ovogodišnjem okupljanju guvernera upravo ovdje, u Sarajevu - predivnom gradu sa različitim kulturama, u srcu dinamičnog regiona koji ima ogroman potencijal za razvoj.

Naravno, ovaj sastanak ima značaj i za Bosnu i Hercegovinu. Međutim, jednako je bitan i za cijeli region Zapadnog Balkana, naročito zato što je u okviru ovogodišnjeg sastanka organizovan panel koji će voditi šest lidera sa Zapadnog Balkana, odmah nakon ove uvodne sjednice; velika nam je čast što su danas sa nama.

Tema 28. godišnjeg sastanka EBRD-a - povezivanje ekonomija radi jačeg rasta - relevantna je ne samo za Zapadni Balkan, nego i sve zemlje u kojima Banka posluje.

Iz ugla moje pozicije kao potpredsjednika Evropske komisije, ova godina ključna je i za Evropsku uniju pošto je naša Strategija za Zapadni Balkan na snazi već godinu dana.

Evropska unija je već dugo i intenzivno angažovana u ovom regionu, koji ima snažne geografske i kulturne veze sa državama članicama Evropske unije u okruženju.

Zemlje Zapadnog Balkana su dio Evrope. Građani Evropske unije i regiona dijele zajedničku istoriju i naslijeđe, kao i budućnost koju odlikuju zajedničke mogućnosti i izazovi, što je realnost koju svi uviđamo.

Ova zemlja i region dali su mnogo pouka iz kojih svi možemo da učimo. To su pouke koje govore o sposobnosti prilagođavanja, pouke o preduzetništvu, pouke o integraciji i pouke o pomirenju.

Kada budemo razmišljali o ovim poukama, uvažimo uticaj EBRD-a i značaj svih akcionara Banke i ključnih aktera kao najbitnijih partnera koji sarađuju na rješavanju zajedničkih izazova.

Velika snaga EBRD-a leži u podršci njenih akcionara i privilegija je vidjeti vas u tolikom broju. Okupili smo se da bismo došli do zajedničke vizije našeg doprinosa bržem napretku na putu tranzicije ka izgradnji stabilnijih, sigurnijih i prosperitetnijih privreda.

Dozvolite mi da poželim toplu dobrodošlicu delegaciji Indije, koja prvi put prisustvuje godišnjem sastanku EBRD-a. Dobrodošlicu želim i delegacijama Iraka i San Marina, i nadamo se da ćemo ih uskoro pozdraviti kao nove članice EBRD-a.

Bosni i Hercegovini ovaj godišnji sastanak daje jedinstvenu platformu da predstavi sebe i region Zapadnog Balkana kao destinaciju atraktivnu za investicije.

Bosna i Hercegovina dobila je sredstva i od Evropskog zajedničkog fonda za Zapadni Balkan, fonda različitih donatora kojim upravljaju EBRD i Evropska investiciona banka po osnovu Investicionog okvira za Zapadni Balkan. Evropska unija je ponosna što je bila ključni akter u ovim inicijativama u saradnji sa EBRD-om, EIB-om i drugima.

Da bi se obezbijedio adekvatan poslovni ambijent, intenzivnije angažovanje Evropske unije na Zapadnom Balkanu uopšte ostaje relevantno pošto su još uvijek prisutni mnogobrojni izazovi. Komisija je to jasno navela u svojoj Strategiji za Zapadni Balkan, koja je objavljena u februaru 2018. godine. Predstojeći paket proširenja konkretnije će se baviti kretanjima u regionu.

Tokom prošle godine, uprava EBRD-a uradila je strateški pregled - bitan korak koji je uslijedio nakon godišnjeg sastanka. Znam da je urađeno dosta dobrih stvari, a neke su već obuhvaćene najnovijim Planom za sprovođenje Strategije za period 2019 - 2021. Međutim, danas očekujem da od naših partnera čujemo više o tome kako žele da doprinesu radu na ovom strateškom pregledu i tako obezbijede puno ostvarenje svojih ciljeva tranzicije u narednim godinama.

U skladu sa svojim etabliranim ugledom, od našeg posljednjeg sastanka do danas, EBRD je već donijela veliki broj novih politika: ekološku i socijalnu politiku, politiku pristupa informacijama i politiku odgovornosti za projekte.

Ove politike dopunjavaju ciljeve EBRD-a iz dokumenta Prelazak na zelenu ekonomiju i ostaju visoko na listi prioriteta.

Odobrena je i nova politika domicilacije, kojom se promovišu strožiji međunarodni i evropski standardi, koji će nam pomoći da zaštitimo svoju zemlju od praksi koje erodiraju poresku bazu na koje se naše društvo oslanja.

Važno je da Banka zadrži svoj rejting sa ocjenom AAA. Ovaj rejting potvrdile su tri najveće agencije za ocjenu kreditnog rejtinga, uprkos regionalnim i globalnim finansijskim i ekonomskim izazovima tokom posljednjih godina.

Zahvaljujem se predsjedniku EBRD-a i Odboru direktora na njihovom radu, naročito za nacrt izvještaja i Rezoluciju o pripremama za Strateški kapitalni okvir za period 2021 - 2025. Zamolio bih ih da i dalje zajednički rade na vođenju aktuelnih poslova Banke.

Tokom naredna dva dana, biće riječi o širokom spektru pitanja koja su relevantna za sve zemlje u kojima Banka posluje: o ekonomskoj tranziciji, klimatskim promjenama, inovacijama, pristupu malih i srednjih preduzeća finansiranju, migracijama, turizmu i digitalizaciji; o pitanjima koja će oblikovati našu budućnost i investicione prilike na Zapadnom Balkanu.

S obzirom da ulazimo u posljednju godinu Strateškog kapitalnog okvira za period 2016 - 2020, nešto kasnije u toku dana zamolićemo Banku da preuzme inicijativu i pripremi naše odluke u 2020. o budućem strateškom i kapitalnom okviru za period 2012 - 2025.

Kolege guverneri, na današnjem sastanku treba da se osvrnemo ne samo na iskustva i pouke koje smo izvukli iz protekle godine, nego da pogled usmjerimo na zajedničku buduću viziju Banke. Svijet je u takvom stanju da su nam potrebne energične, kreativne, multilateralne institucije usmjerene na rezultate da bismo podigli i realizovali naše ambicije zarad ostvarivanja boljeg svijeta.

EBRD je upravo takva institucija, a mnogi njeni atributi upravo su oni za koje smo, u toku razgovora o narednom višegodišnjem okviru za finansiranje, rekli da su ključni za budućnost. Banka ima zdrav apetit za rizik. To je regionalni partner sa snažnim prisustvom na lokalnom nivou. Banka ima jedinstven poslovni model izgradnje održivih tržišta, gdje koristi investicije u privatni sektor i kombinuje komercijalno orijentisanu podršku projektima sa reformama u sferi politika. Pri tom, Banka je lider među razvojnim bankama, a njen model treba drugima da posluži kao recept ukoliko želimo da budemo uspješni u ostvarenju tranzicije i ekonomskog razvoja.

Izuzetno se radujem slobodnoj i konstruktivnoj diskusiji o ovim pitanjima - diskusiji koja će sigurno pomoći da odredimo pravac u kom Banka treba da ide narednih godina.

Ostvarivanje inovativnog, prilagođenog i snažnog uticaja i visokokvalitetnih investicija i reformi u sferi politika zahtijeva energično angažovanje svih u

Banci - ne samo predsjednika Chakrabartija i njegove uprave, nego i svog osoblja EBRD-a.

Stoga, u ime svih guvernera, zahvaljujem predsjedniku i njegovim saradnicima na posvećenosti u ovim vremenima koja obiluju izazovima, kao i Odboru direktora na usmjeravanju strateških pravaca naše EBRD.

Konačno, u ime guvernera i u svoje lično ime, izražavam veliku zahvalnost vlastima Bosne i Hercegovine kao domaćinu ovog sastanka.

Zahvaljujem.

* * *